

FJALA E DEPUTETES GRETA BARDELI

E ENJTE 9 QERSHOR 2022

Të nderuar deputetë,

Të nderuar qytetarë,

Sapo votuam Autoritetin për Informimin mbi Dokumentet e ish-Sigurimit të Shtetit. Do të ishte e drejtë që grupet kryesore në parlament të kishin dakordësi për propozimet, por mund t'i lihej me dakordësi dhe një grupi deputetësh, që përfaqësojnë shtresën e të përndjekurve politik, propozim për kandidaturat, por si gjithçka dhe kjo nuk u bë e mundur. Këtu në këtë sallë disa seanca më parë u zhvillua një nga debatet më të padenja për shtresën e të persekutuarve politikë.

Meqenëse nuk kisha mundësinë të t'i thosha dy fjalë, sot kam rastin t'i them nga kjo foltore Kryeministrit: nëse e ke të vështirë të kuptosh Shkodrën pse nuk ta jep votën, pse është aq vendosur dhe pa kompromis, në raport me të shkuarën antikomuniste, pse Partia Demokratike është përherë në maxhorancë dhe ju jeni në minorancë në Shkodër, po të jap këto përgjigje, në respekt edhe të bashkëqytetarëve të mi: Në Shkodër gjatë diktaturës u hapen 13 burgje. Në një qytet, që shquhej për kulturën, hapja e tyre ishte një gjë shumë e rëndë dhe e shëmtuar. U kthyen në burgje politike shtëpi banimi, kuvendi françeskan, kinemaja, teatri dhe shumë objekte të tjera kulturore e të besimit.

Shkodra ka pasur rreth 3000 të burgosur politikë, rreth 2000 të internuar politikë, 601 të pushkatuar politikë, 140 të vdekur ndër burgje dhe shumë të tjerë, të cilëve ende sot nuk u janë gjetur eshtrat nga familjarët e tyre. Shkodra nuk harron se deputetët e parë në parlamentin e vitit 1991, që diskutonin për projektligjin për amnistinë e të burgosurve në diktaturë, ishin drejtuesit e atij regjimi, duke nisur nga ish-sekretari i parë, ish-kryeministri, që ishin bërë deputetë në hapat e parë të demokracisë! Ironia ishte që ata nxitonin të mbronin projektligjin, por, në fakt, e bënë për të shfajësuar veten e tyre.

Ndaj, mendoj që debate të tilla duhet të jenë të kujdesshme, se fjalori nuk mund të jetë qesim e respekti nuk mund të jetë fasadë. Sot shumë familje në Shkodër ende nuk kanë marrë dëmshpërblimin financiar që u takon si të përndjekur politikë. Prandaj, Shkodrën të mos guxojë kush ta fyejë, meqë nuk i jep votën. Investimet dhe kujdesi për ta zhvilluar kryeqendrën e Veriut është detyrim i çdo qeverie dhe përgjegjësi e çdo kryeministri, pa asnjë diskutim!

Në fund po citoj një thënie e dalë nga kjo sallë në seancën e 3 korrikut të vitit 1991: “Në qoftë se ka njeri që ka të drejtë të ankohet, unë jam një nga ata. Megjithatë, unë asnjëherë s’e kam hapur gojën të flas për vuajtjet e mia dhe asnjëherë as kam sharë, as kam fyer njeri”. Ky ishte burri i shtetit, Mandela i Shqipërisë, Pjetër Arbnori.